

ՄԿՐՏՈՒԹԵԱՆ ԾԷՍԸ ՀԱՅՈՑ ՄԷՋ

Անահիտ Մխիթարեան

Ծէսը ազգային մտածողութեան ու աշխարհընկալման դրսեւորումն է, որը ձեւաւորուել է վաղնջական ժամանակներէ: Թէ՛ հին եւ թէ՛ յետագայ բոլոր ժամանակներում մարդու ծնունդն ու կնունքն օրինականացուել են մի շարք ծէսերով ու ծիսահմայական գործողութիւններով:

Մկրտութեան ծէսի մասին վկայութիւններ են պահպանուել ինչպէս ժողովրդական բանահիւսութեան մէջ, այնպէս էլ Ե.-ԺԸ. դարերի միջնադարեան սկզբնադրերներում: Ազաթանգեղոսը յիշատակում է, թէ ինչպէս է Գրիգոր Լուսաւորիչը Եփրատում մկրտում հայոց թագաւորին, նրա ընտանիքին ու հազարաւոր մարդկանց. «...Եւ իբրեւ իջանէին մարդիկն ամենայն եւ թագաւորն ի մկրտութիւն անդր, ի ջուրսն Եփրատ գետոյն՝ նշան սքանչելի երեւեալ յԱստուծոյ: ... Եւ իւղն աւծութեան, զօր արկանէր Գրիգորիոս ի վերայ մարդկանն՝ շրջան առեալ ի մէջ գետոյն շուրջ զմարդկան խաղայր: ... Եւ անտի ելեալ մեծաւ ցնծութեամբ եւ սպիտակազգեստ հանդերձիւք, սաղմոսիւք եւ աւրհնութեամբք կանթեղաւք վառելովք, եւ մոմեղինաւք լուցելովք...»:¹

Մկրտութեան ժամանակ սովորութիւն էր սպիտակ հագնել՝ իբրեւ մաքրութեան խորհրդանիշ. «Յետ Մկրտութեան՝ ընդհանուր քրիստոնէից սովորոյթն էր սպիտակ

զգենուլ՝ ի նշան մաքրութեան հոգւոյ: Այսպէս եւ Հայք, երբ մկրտուեցան Լուսաւորչէն, «սպիտակ հանդերձիւք» գետէն եկեղեցի կը դառնան»:²

Հայոց մէջ Մկրտութեան ծէսը հանդէս է գալիս հիմնականում կնունք անուամբ: Ըստ ժողովրդական հաւատալիքների՝ «եթէ ծնունդն առաջինն է, եւ մայրը տանջուած է սանջու ցաւով, ամուսինը ջուրը մկրտում է, այսինքն՝ մկրատով կտրում է»³. այստեղից էլ գուցէ առաջացել են մկրատել, մկրտել անուանումները⁴:

Ազգագրական որոշ շրջաններում տարբերակում էր կնունքն ու Մկրտութիւնը, օրինակ՝ Ջաւախքում քահանան գալիս էր տուն եւ տանն էր կատարում կնունքի խորհուրդը, որից յետոյ բոլորը, բացի ծնողներից⁵, գնում էին եկեղեցի՝ շարունակելու արարողութիւնը:

Եկեղեցում միաժամանակ մի քանի կնունք լինելու դէպքում նախ եւ առաջ մկրտում էին տղայ երեխային, եթէ անգամ քահանան արդէն սկսած էր լինում աղջիկ երեխայի արարողութիւնը⁶, ընդհատում եւ մկրտում էր տղային: Լինում էին նաեւ դէպքեր, երբ մի քանիսին միանգամից էր կնքում քահանան:

Այն վայրերում, ուր չկար եկեղեցի, մկրտում էին որեւէ սրբավայրում, մատուռում, որը համարւում էր մկրտարան կամ

1 Ազաթանգեղոս, Պատմութիւն Հայոց (Դարձ փրկութեան աշխարհիս Հայաստան): Տե՛ս Մատենագիրք Հայոց, Բ հտ., Ե. դար, Անթիլիաս-Լիբանան, 2003, էջ 1700-1701:

2 Հացունի Վ., Պատմութիւն հին հայ տարագին, Վենետիկ, 1923, էջ 295:

3 Լալայեան Ե., Զատախք, - «Ազգագրական հանդէս» (այսուհետեւ՝ ԱՀ), գիրք Ա., Ծուշի, 1895, էջ 271:

4 «Մկրտել» բառն ունի վաղ հիմքեր. այն առաջացել է «մկրատել, կտրել» անուանումներից: Տե՛ս Նոր բառգիրք Հայկազեան լեզուի, հտ. Բ, Վենետիկ, 1836, էջ 285: Տե՛ս նաև Մխիթարեան Ա., Մկրտութեան եւ որոշմի խորհուրդների նշանակությունը, - «Հանդէս ամսօրեայ», թիւ 1-12, Վիեննա, 2020, էջ 486:

5 Լալայեան Ե., Զատախք, էջ 271:

6 Նոյն տեղում, էջ 270:

մկրտատուն⁷: Եթէ Մկրտութիւնը տանն էր կատարուում, ապա արարողութիւնն անում էին թոնրի շուրջը⁸ կամ մեռնաջրով լցուած մաքուր թասի, անգամ հացի տաշտի մէջ: Էպոսում Սանասարին ու Բաղդասարին Մելիքսէթ քահանան նոյնպէս կնքում էր թոնրի վրայ:

«Իմն ամիս վոր թամամից, // Աստուածութուն
Խաչապաշտ թագաւորի աղջկան

Երկու տղայ տուից. // Վարդապետ թոնդրան
վրայ կնքից.

Մէկի անուն դրից Սանասար, // Մէկին՝ Բաղ-
դասար»⁹:

Կնունքը, որքան հնարաւոր էր, շուտ էին կատարել, քանի որ ժողովրդի մէջ պահպանուած էր այն սնահաւատութիւնը, թէ չարքերն անկնունք երեխաներին վնաս են հասցնում, ուստի երեխայի Կնունքը կատարուում էր ծննդեան եօթերորդ օրը լրանալուց յետոյ¹⁰: Սակայն այսպիսի Մկրտութիւններն աւելի ուշ շրջանի երեւոյթ են եղել, քանի որ վաղ ժամանակներում մկրտուել են ոչ թէ մանկահասակները, այլ չափահասները: Մաշտոց ծիսական ժողովածուի հնագոյն բնագրերից երեւում է, որ մկրտողները չափահաս են եղել¹¹:

Մկրտութիւնից յետոյ չափահաս տղաները մնում էին եկեղեցում ութ օր. «Եւ ութ աւր յեկեղեց(ւ)ոջն կացցէ, սպիտակասզգեստ լիցի եւ գլուխն ծածկէ(ս)ցէ սպիտակ փակեղամբք, զգոյշ կացցէ աղաւթից եկեղեց(ւ)ոյն պարապելով յամենայն ժամ, հաղորդելով մարմնոյ եւ արեանն Քրիստոսի: Եւ յետ ութ աւուր, վերացուցանէ քահանայն զպսակն...»¹²:

Ինչպէս տեսնում ենք, մեծահասակների Մկրտութիւնն աստիճանաբար տեղի է տուել նորածին երեխաների Մկրտութեանը, որոնց կրօնական դաստիարակութեամբ պէտք է զբաղուէին կնքահայրերը եւ նրանց փոխարէն պատասխանատու լինէին հասարակութեան առաջ. «...կնքահայրն խրատէ եւ կերակրէ զնա բանիւ եւ զգեցուցանէ զնա: ...եւ թէ մկրտեալն փոքր լիցի եւ թէ մեծ՝ պիտոյ է կնքահայր, զի լեզու եւ միջնորդ է նա առ քահանայն»¹³:

Մկրտութեան նախորդ օրը՝ երեկոյեան, մկրտող երեխայի տնից տատմօրը նուէրներով (մրգեղէն, գաթայ, օղի կամ գինի, հալուայ, եփած հաւ, երբեմն էլ՝ ոչխար՝ եղջիւրներին կանաչ-կարմիր թել կապած եւ այլն, ինչպէս նաեւ մի քանի զոյգ գուլպայ ու թաշկինակ)¹⁴ ուղարկում էին կնքա-

7 Տուն և տեղի մկրտելոյ, մատուոն՝ յորում կանգնեալ կայ աւագան մկրտութեան՝ մօտ առ մեծ եկեղեցին, կամ ի մէջ մորա ի կողմն մի: Տե՛ս Նոր քաղաքիք Հայկազեան լեզուի, հտ. Բ, Վեմետիկ, 1836, էջ 285:

8 Լալայեան Ե., Վարանդա, - ԱՀ, գիրք Բ., Թիֆլիս, 1897, էջ 148:

9 Սանա ծոնք, հտ. Ա, խմբագրութեամբ Մ. Արեղեանի, Եր., 1936, էջ 129:

10 Որոշ շրջաններում մկրտում էին ծննդեան առաջին շաբաթում: Տե՛ս Լալայեան Ե., Նախիջևանի գաւառ, Ա. մաս՝ Գողթն, - ԱՀ, գիրք XII, Թ., 1905, էջ 138: Մուրադեան Յ., Համշէնցի հայեր, - ԱՀ, գիրք Ե., Թիֆլիս, 1899, էջ 363:

11 Տե՛ս Մաշտոց. արարողութիւնք պաշտամանց եկեղեցւոյ Հայաստանեայց՝ ըստ կարգաւորութեան սրբոց հարցն մերոց, բաղդատութեամբ բազմաթիւ եւ հմագիր օրինակաց իբր յիսնից մաւե հմագոյն երկաթագիր ձեռագրի, Վեմետիկ,

1831 (այսուհետեւ՝ Մաշտոց, Վեմետիկ, 1831), էջ 1: Տե՛ս մաւ Հ. Ծեմմեմեան Ս., Մկրտութեան արարողութիւնը Մաշտոցներու մէջ, - «Բազմավէպ», 1971, թիւ 1-2, էջ 27: Հ. Հացունի Վ., Ժաշեր եւ խնձոյք հին Հայաստանի մէջ, Վեմետիկ-Ս. Ղազար, 1912, էջ 400:

12 Ձեռ. 457, Մաշտոց, Թ. կամ Ժ. դ., «Կանոն Մկրտութեան [եւ Կնունք տալոյ] յորժամ քրիստոնեան(յ) առնեն», թղ. 76ա: Տե՛ս Մայր ցուցակ հայերէն ձեռագրաց Մատենադարանին Մխիթարեանց ի Վեմետիկ, հտ. Գ, Մաշտոց - Գիրք ձեռնագրութեանց, յօրինեցին Հ. Բարսեղ Սարգսեան եւ Հ. Գրիգոր Սարգսեան, Վեմետիկ-Ս. Ղազար, 1966 (այսուհետեւ՝ Վեմետիկի ցուցակ, հտ. Գ), էջ 22:

13 Գրիգոր Տաթևացի, Գիրք քարոզութեան, որ կոչի Ամառան հատոր, Երուսաղէմ, 1998, էջ 145:

14 Դա կոչուում էր «սեղան»: Տե՛ս Լալայեան Ե., Վարանդա, - ԱՀ, գիրք Բ., Թ., 1897, էջ 148:

Հօր տուն, որպէսզի հրաւիրի յաջորդ օրը երեխային մկրտելու: Գողթան գաւառում¹⁵ կնքահօրն ուղարկած այս խոնջան կոչւում էր «կնքալուսիկ», որը բաղկացած էր լինում չորս խնձորից, մի փունջ ծաղկից եւ մի կուժ գինուց: Կնքալուսիկն ստանալուց յետոյ քաւորն էլ սանամօր համար էր ուղարկում «թաքախ»¹⁶ (մատուցարան, ուր դրուած էին լինում մի շիշ օղի կամ մի կուժ գինի, մի ափսէ հալուայ, կարմիր ձուեր, տապակած հաւ կամ ոչխարի մի բուռ եւ այլն): Որոշ տարածաշրջաններում կնքահայրը փոխադարձաբար նուէրը տալիս էր հէնց տատմօրը՝ հիմնականում մթերքի, երբեմն էլ՝ մի փոքր գումարի տեսքով, իսկ երեխայի համար ուղարկում էր չիւն կամ թաւէ կարմիր կտոր ու սաւան¹⁷, որը կոչւում էր կնքուղ¹⁸ (կնկուղ, կնքակտոր): Դա երեխայի վրայ էին գցում եկեղեցուց տուն տանելիս¹⁹: Յաճախ կնկուղը կնքահայրն էր իր հետ տանում էր եկեղեցի հէնց Մկրտութեան օրը²⁰: Նորածնի տատը եկեղեցի էր ուղարկում նարօտ՝ սպիտակ ու կարմիր կամ կանաչ ու կարմիր թելերից հիւսուած²¹: Նոյն երեկոյեան ծննդկանի տնից մթերքի ձեւով նուէրներ ու մի զոյգ մօմ էին ուղարկում քահանային եւ հրաւիրում՝ երեխային մկրտելու:

Հիմնականում մկրտուող երեխային եկեղեցի էր տանում տատմայրը (տատմօր փոխարէն կարող էր լինել դայակը կամ մանկաբարձը): Նրա հետ եկեղեցի էր գնում

նաեւ մի երեխայ՝ տանելով փարչով լի տաք ջուր, որը կոչւում էր կնքափարչ²²: Զաւախքում դայակն իր տնից էր տանում բարուրի պարագաները, եթէ երեխան առաջնեկն էր. «մեռնալաթը տանից են տանում եւ վերջն ընծայում եկեղեցուն»²³:

Եկեղեցու մուտքի մօտ տատմայրը դնում էր երեխային գետնին, իսկ կնքահայրը ծնկի էր գալիս ու վերցնում. «եւ դնէ մանկաբարձն զտղայն ի գետինն՝ առաջի դրան եկեղեցոյն, որ նշանակէ զարտաքսիլն Ադամայ ի դրախտէն եւ զանկանելն յերկիրս անիծից: Եւ ասէ քահանան սաղմոս. «Ի քեզ անկայ ես յարգանդէ [յորովայնէ մօր իմոյ, դու ես Աստուած իմ]: Եւ գայ կնքահայրն եւ Գ. ծուներ կրկնէ եւ առնու զտղայն ի գետնոյն ի վեր յաւրինակ Քրիստոսի, որ է առ ազամական բնութիւնս եւ Հօր Աստուծոյ որդիացոց»²⁴: Ապա կնքահայրը երեխային գրկում եւ մօտենում էր բեմի ձախ կողմում գտնուող մկրտութեան աւազանին, իսկ քահանան լինում էր եկեղեցու աջ կողմում: Նրանք կանգնում էին դէմքով դէպի արեւմուտք՝ ասելով նախ՝ «հրաժարիմք», ապա՝ «հաւատամք», այսինքն՝ մկրտուողը, հրաժարուելով մեղանշական աշխարհից, շրջւում էր դէպի հաւատք՝ դառնալով քրիստոնէական եկեղեցու անդամ:

Մկրտութեան աւազանի մօտ ջուրը մտցնելու համար քահանան պահանջում էր մերկացնել երեխային (տղային), որը

15 Նոյնի՝ Նախիջևանի գաւառ, Ա. մաս՝ Գողթան, – ԱՀ, գիրք XII, Թ., 1905, էջ 138:

16 Նոյն տեղում:

17 Սաւան – Նորածին սանկի համար կնքափոր անփորած շորեղէն (շապիկ, գլխարկ և այլն): Տե՛ս Աղայեան Է., Արդի հայերէնի բացատրական բառարան, Եր., 1976, հտ. Բ, էջ 1282:

18 Կնքուղ – Մկրտուող երեխայի վրա գցուող սաւան կամ շոր (նոյն տեղում, հտ. Ա, էջ 742):

19 Լալայեան Ե., Սիսիան, – ԱՀ, գիրք Գ., Թ., 1898, թ. 1, էջ 230:

20 Համշէնում կնքափայրը ո՛չ երեխային, ո՛չ էլ ծննդկանին ոչինչ չէր տալիս, միայն որոշակի

գումար էր տալիս քահանային ու դայեակին: Տե՛ս Մուրադեան Թ., Համշէնի հայեր, էջ 364:

21 Լալայեան Ե., Բորչալուի գաւառ, – ԱՀ, գիրք IX, Թ., 1902, էջ 254:

22 Նոյնի՝ Մուշ-Տարօն, – ԱՀ, գիրք XXVI, Թ., 1916, էջ 180:

23 Նոյնի՝ Զաւախք, – ԱՀ, Ա. գիրք, Ծուշի, 1895, էջ 270:

24 Երևանի Մաշտոցի անուան Մատենադարան (այսուհետեւ՝ ՄՄ), ձեռ. 2788, Մայր Մաշտոց, Աղթամար, 1463 թ., էջ 74բ:

խորհրդանշում էր մկրտություն ադամական մեղքից ազատելը եւ Սուրբ Հոգու զօրութեամբ նոր կեանքով նորոգելը: Ապա հազցնում էին մկրտողին. «...եւ դնէ կնկուղն ի գլուխ. Դի՛ր, տէ՛ր, սաղաւարտ փրկութեան ի գլուխ սորա, պատերազմել ընդ զօրութիւնս թշնամ(ւ)ոյն: Եւ ապա կապէ զնարաւտն ի վիզն. Զգեցո՛ւ, Տէ՛ր, պարանոցի սորա զօրութիւն եւ սրբեա՛յ յամենայն աղտեղութենէ մեղաց, շնոյ[ր]հօք: Զմիջացն. Շուրջ պատեսցէ կամար հաւատոյ զմէջս սրտի եւ զմտաց սորա...: Ապա կապեսցէ ի վերայ սպիտակ զգեստ եւ ասէ. Զգեցեալ սպիտակ զնասցէ անյաղթ առաջի աթոռոյն Աստուծոյ Տեառն մերոյ Յիսուսի Քրիստոսի...: Ապա տայ մոմ կարմիր եւ կանաչ ի ձեռն եւ ասէ. Ա՛ռ զլապտերս հաւատոյ եւ բարի գործոց, զի ի գալն երկնաւոր փեսային՝ արժանասցիս մտանել ի յառագաստն լուսոյ ի վայելել ի կեանսն յաւիտենից»²⁵: Իսկ մեկ այլ ձեռագրում յիշատակում է. «եւ կապեն գաւտի ի մէջսն, եւ թագ ի գլուխն, եւ խաչ ի վիզն»²⁶:

Միջնադարում գօտին ունեցել է իր խորհուրդն ու նշանակութիւնը²⁷. «առաջին գաւտի քրիստոնէականն է, որ յետ կնքոյն յաւազանն զգեցուցանէ քահանայն սպիտակ հանդերձ եւ ածէ գաւտի ընդ մէջն՝ զնարաւտն, մանեալ կարմիր եւ սպիտակ»²⁸: Յովհաննէս Երզնկացին յիշատակում է նաեւ մանկտաւազներին²⁹, որոնք

որդեգրում էին մանուկներին եւ նրանց հասունանալուց յետոյ գօտի էին տալիս.

«Յորժամ գօտի տայ մանկտաւազն որդեգրին, ասէ. «ո՛վ որդեակ, պատուիրեմ քեզ ժէ. բանս, որոց առաջին այս է՝ սիրեա՛ զաստուած, որ քո արարիչ է... Քո ծնողացն հնազանդ կաց եւ պատուեա՛ զնոսա, զի յետ Աստուծոյ մարդոյն երախտաւոր ծնաւդքն են: Սիրեա՛ զաշխատիլն, որ ի քո վաստակոցն դու ուտես եւ այլոց տաս...: Ընդ ամենայն մարդոյ զխաղաղութիւն կալ եւ մի՛ լինիլ կռուասէր, զի խաղաղասէրն որդի Աստուծոյ է...»³⁰:

Երբ մանուկը յանձն էր առնում կատարել այս ամենը, մանկտաւազը գօտի էր կապում նրա մէջքին՝ ասելով. «Աստուած շնորհաւոր առնէ»: Ապա նրան օրհնում էին միւս եղբայրները (տղաները), եւ ծիսակատարութիւնն աւարտւում էր: Մանկտաւազը պարտաւոր էր մանուկներին ուսուցանել մարդասիրութիւն, աշխատասիրութիւն, ֆիզիկական ցանկութիւնների զսպուածութիւն եւ նմանատիպ այլ բաներ:

Երզնկացին ընդհանրութիւններ էր նկատում կնքահօր եւ մանկտաւազի պարտականութիւնների միջեւ, այսինքն՝ նրանք նոյն գործառնոյթն ունէին. «թէպէտ ամենայն շնորհք յեկեղեցին բաշխի ձեռամբ քահանայիցն, բայց որ բարեգործ եւ սուրբ քրիստոնեայք են, նոցա արժան է, որ

25 Ձեռ. 711, Մաշտոց ԺԷ, ԺԴ. կամ ԺԵ. դար, թղ. 15բ-16բ: Տե՛ս Վեմետիկի ցուցակ, էջ 209:

26 Ձեռ. 138, Մաշտոց ԻԱ, ԺԵ. դ., թղ. 20բ: Տե՛ս Վեմետիկի ցուցակ, էջ 222:

27 Գօտու և նրա ծիսական նշանակության մասին տե՛ս Գրիգոր Տաթևացի, Գիրք քարոզութեան, որ կոչի Ձմեռան հատոր, Երուսաղէմ, 1998, էջ 666: Քաջբերունի, Հայկական սովորոյթներ, – ԱՀ, գ. 7-8, Թիֆլիս, 1901, էջ 177: Լիսիցեան Ստ., Զանգեզուրի հայերը, Եր., 1969, էջ 194: Յարութիւնեան Ս., Հայ առասպելաբանութիւն (Ծիսական գօտու առասպելոյթը), Բէյրութ, 2000, էջ 210-219: Ստեփանեան Ա., Հայ ժողովրդական տարագի զարդանախշերը, – Հայ ազգագրութիւն և բանահիւսութիւն, հտ. 22, Եր., 2007, էջ 16-21:

28 Յովհաննէս Երզնկացի, Մատենագրութիւն. Ծանոթ եւ քարոզներ, հտ. Ա, բնագրերը հրատարակութեան պատրաստեցին Ա. Երզնկացի – Տէր-Սրապեանը եւ Էդ. Բաղդասարեանը, Եր., 2013, էջ 410:

29 Մանկտաւազ – Նշանակում է «մանուկների, պատանիների խմբի ղեկավար անձ». բաղկացած է «մանկտի» (պատանի, երիտասարդ, զինուոր) և «տաւազ» բառերից: Տե՛ս Խաչիկեան Լ., 1280 թուականին Երզնկայում կազմակերպուած «Եղբայրութիւնը», – Աշխատութիւններ, հտ. Ա, Եր., 2012 թ., էջ 264-284:

30 Բաղդասարեան Էդ., Յովհաննէս Երզնկացի և նրա խրատական արձակը, Եր., 1977, էջ 237-238:

լինին մանկտաւագ, եւ որպէս հայր եւ ծընաւդ գլխայ ի հոգեւոր որդիան եւ յորդորեն զմանկունսն յամենայն գործս բարիս, եւ բանիւ եւ գործով առաջնորդեսցին նոցա, եւ տան գօտի սրբասէր մանկանցն»³¹: Ըստ Երզնկացու՝ մանկտաւագութիւնն աշխարհական գործ է եւ եկել է շատ հնուց: Այդ մասին վկայում է նաեւ Ալիշանը՝ ուշադրութիւն հրաւիրելով հեթանոսական ժամանակների՝ թուով ութսուն «տանջանաց աստիճանների» վրայ, որոնք «նոր ժամանակաց աշակերտութեան կամ նուիրապետութեան կարգաց զուգուին»³²: Հափահասների Մկրտութեան հետ. «ապա ի ժամ մկրտութեան առ դրան եկեղեցւոյն ուխտիւն զայս կարգ ի վերայ տղայոցն եւ հափահասակացն»³³: Սա համարուել է հոգեւոր ձեռնադրութիւն: Սակայն, բացի հոգեւոր ձեռնադրութիւնից, տեսնում ենք նաեւ մկրտուողի մոտքն աշխարհիկ նոր կեանք. «քանզի Մկրտութիւնն է խորհուրդ վերածնելութեան ի նոր կեանս: Եւ դրոշմն է խորհուրդ զինուորութեան, որով բարուք սպառազինի ոք ընդդէմ մարտնչողացն հաւատոյ... որպէս եւ ըմբիշն օծանի իւղով, զի անըմբռնելի լիցի ի մրցամարտէն»³⁴:

Կնուների ժամանակ յաճախ կատարուել է նաեւ երեխայի անուանակոչութիւնը: Սովորաբար քահանան է որոշել անունը՝ ընտրելով այդ օրը յիշատակուած սրբերի անուններից, իսկ երբեմն էլ՝ գերդաստանի մեծը՝ գերդաստանի մահացած որեւէ անդամի յիշատակը վառ պահելու ցանկութեամբ:

Հայոց եկեղեցական կարգի համաձայն՝ ծննդաբերութիւնից մինչեւ Կնուներ

թէ՛ ծննդկանը, թէ՛ նորածինը, թէ՛ տատմայրն ու մանկաբարձներն անսուրբ էին համարուում: Մարդիկ աշխատում էին նրանց հետ չչփուել, հաց չուտել, պղծուած էին համարուում նոյնիսկ այն իրերը, որոնց նրանք ձեռք էին տալիս (նրանց համար առանձին ափսէներ էին պահում եւ Մկրտութիւնից յետոյ սրբում ու լուանում էին միւռոնաջրով):

Մկրտութեան խորհուրդը եկեղեցւում կատարելուց յետոյ քահանան երեխային յանձնում էր քաւորին, եւ միասին գնում էին մկրտուողի տուն: Շատ վաղ ժամանակներում քահանան եկեղեցուց տուն գնալու ճանապարհին, բացի շարականներ երգելուց, փոքրիկ զանգակներ է հնչեցրել³⁵, որը, հաւանաբար, ունեցել է չարը վանելու, հեռացնելու խորհուրդ:

Բուլանխում երեխային մկրտելուց յետոյ դնում էին մօր կողքին՝ մաղի վրայ. «ըստ ոմանց՝ մեռնի սրբութիւնը յարգելու համար»³⁶: Տանը, երբ կնքահայրը երեխային տալիս էր մօրը, նորածնի մայրը խոնարհուում, համբուրում էր քաւորի ոտքը եւ վերցնում էր բարուրը, ապա համբուրում էր քաւորի ձեռքը. «ծննդկանը կիսահագնուած պառկած է լինում իւր անկողնի մէջ, եւ աջ կողմում դրուած է լինում մի խոնչայ՝ վերան երկու լաւաշ հաց: Ծննդկանը երեխային դնում է հացերի վրայ»³⁷ եւ քաւորի ձեռի երկու մոմը (որը եկեղեցւում արարողութեան ժամանակ քաւորի ձեռքին է լինում) վառում երեխայի գլխի ու ոտների մօտ»³⁸: Իսկ աւելի ուշ շրջանում արդէն քաւորի ոտքը

31 Նույն տեղում, էջ 70-71:

32 Ալիշան Հ. Ղ., Հին հուատք կամ հեթանոսական կրօնք Հայոց, Վեներիկ, 1895, էջ 284-285:

33 Մաշտոց, Վեներիկ, 1831, էջ 4:

34 ՄՄ, ձեռ. 2980, Յակոբ Նալեան, Մեկնութիւն եօթն խորհրդոց եկեղեցւոյ, Կոստանդնուպոլիս, 1764, էջ 121աբ:

35 Լալայեան Ե., Վայոց ձոր, - ԱՀ, գիրք XIII, Թ., 1906, էջ 141:

36 Բենսէ, Բուլանխ կամ Հարք գաւառ, - ԱՀ, գիրք Ե., Թ., 1899, էջ 127:

37 Երեխային դնում էին հացի վրա, որպէսզի «երեխան դուրսնայ, կարողութեան տէր լինի»: Տե՛ս Լալայեան Ե., Բորչալոյի գաւառ, - ԱՀ, գիրք IX, Թ., 1902, էջ 254:

38 Նոյնի՝ Գանձակի գաւառ, - ԱՀ, գիրք Զ., Թ., 1900, էջ 279:

Համբուրելու փոխարեն սանամայրը խոնարհվում եւ վերցնում էր երեխային՝ դնելով իր աջ կողմում՝ բարձի վրայ:

Համաձայն քրիստոնէական կանոնների՝ Եկեղեցին արգելել է ազգակցական առաջին կամ երկրորդ աստիճանի ամուսնական կապը կնքաձօր եւ սանամօր միջեւ: Սանշանակում է, որ նախաքրիստոնէական շրջանում այդ կապը եղել է, իսկ յետագայում խիստ մերժուել է Եկեղեցու կողմից: Կնքաձօր եւ սանամօր կապը յատկապէս զգացւում էր ազգագրական շրջաններում կատարուող Կնունքի արարողութեան ժամանակ, երբ քաւորի համար սանամայրը կապում էր «խոնչան»՝ մթերքով ու նուէրներով (մի քանի գոյգ գուլպայ, թաշկինակ, վերնաշապիկ եւ այլն): Մկրտութիւնից յետոյ սանամայրը, քաւորի ձեռքից ստանալով երեխային, համբուրում էր կնքաձօր ոտքն ու ձեռքը, իսկ «քաւորը եւ քահանան նստում էին ծննդկանի անկողնի վրայ՝ մէջք մէջքի տուած եւ մի-մի ափսէ ձուածեղ ուտում»³⁹, որը, ըստ ժողովրդական մեկնաբանման, արւում էր այն բանի համար, որպէսզի երեխան լացկան չլինէր⁴⁰:

Որոշ գիտնականների կարծիքով⁴¹ նորահարսի նկատմամբ քաւորի լիարժէք իրաւունքը հետք է թողել Մկրտութեան ծեսում. նա էր դառնում երեխայի «հոգեւոր» հայրը՝ «կնքահայրը» (մանաւանդ, որ ուխտից յետոյ ծնուած երեխայի քաւորը գօտի կապողն էր լինում⁴²): Այսինքն՝ քաւորը մասնակից էր լինում եւ՛լ ամուսնութեանը, եւ՛լ երեխայի Մկրտութեանը:

Քաւորը կարեւոր նշանակութիւն ունէր հայոց ընտանեկան համակարգում. նրան յարգում ու պատուում էին, մանաւանդ՝ սանամայրը, որը, ի նշան յարգանքի, ցմահ անխօս էր մնում նրա հետ եւ «մինչեւ անգամ նրան տեսնելիս փախչում՝ թաք էր կենում»⁴³: Նշանաւոր տօներին քաւորին «բօղչա» կամ «սեղան» էին ուղարկում՝ երբեմն փոխադարձաբար որեւէ նուէր ստանալով⁴⁴:

Շատ տարածաշրջաններում քաւորութիւնը տոհմական է եղել եւ յաճախ այնքան երկար է տեւել, որ երդուելիս ասել էին. «էն կուժ մեռոն վկայ էղնի»⁴⁵, այսինքն՝ երեխաներին մկրտելով՝ այնքան միւռոն են բերել այդ օջախ, որ կարող էր մի կուժ լցուել: Երբեմն քաւորութիւնը լինում էր փոխադարձ. նման դէպքում քաւորին կոչում էին խաչ-քաւոր: Քաւորին փոխում էին միայն այն ժամանակ, երբ «նրա ոտքը վրայ չի գալիս»⁴⁶, այսինքն՝ նրա մկրտած երեխաները երկար չէին ապրում կամ սանամայրը շարունակ աղջիկներ էր ծնում⁴⁷:

Համշենցիների մօտ կնքահայր լինելը ցանկալի ու նախանձելի էր համարւում. «ամենքն են ուզում սանիկ ունենալ: Դա համշենցիների կարծիքով մեծ վարձք էր: Մարդ անպատճառ գոնէ մի սանիկ պիտի ունենայ կնքած: Նրանց կարծիքով՝ ով որ իր կեանքում բոլորովին երեխայ չի կնքել, միւս կեանքում նրա գրկին մի շուն կը դնեն»⁴⁸:

39 Նոյնի՝ Վայոց ձոր, - ԱՀ, գիրք XIII, Թ., 1906, էջ 141:

40 Նոյնի՝ Նախիջևանի գաւառ, Ա. մաս՝ Գողթն, - ԱՀ, գիրք XII, Թ., 1905, էջ 139:

41 Սամուէլեան Խ., Հիմ Հայաստանի կուլտուրան, հտ. Ա., Եր., 1931, էջ 245:

42 Տե՛ս Լալայեան Ե., Նոր Բայազէտի գաւառ կամ Գեղարքունիք, - ԱՀ, գիրք XVI, Թ., 1907, էջ 52:

43 Նոյնի՝ Վայոց ձոր, - ԱՀ, գիրք XIII, Թ., 1906, էջ 140:

44 Նոյնի՝ Նոր Բայազէտի գաւառ, - ԱՀ, գիրք XVI, Թ., 1907, էջ 38:

45 Նոյնի՝ Մուշ-Տարօն, - ԱՀ, գիրք XXVI, Թ., 1917, էջ 180:

46 Նոյնի՝ Վայոց ձոր, - ԱՀ, գիրք XIII, Թ., 1906, էջ 140:

47 Նոյնի՝ Նոր Բայազէտի գաւառ, - ԱՀ, գիրք XVI, Թ., 1907, էջ 38:

48 Մուրադեան Յ., Համշէնցի հայեր, - ԱՀ, գիրք Ե., Թ., 1899, էջ 364:

Մկրտութիւնից երեք օր յետոյ հանում էին միւսները⁴⁹, որն անուանում էին միւսնահանէք կամ մեռնահանէք: Ազգագրական որոշ շրջաններում, ինչպէս Զաւախքում, աղջկան աւելի ուշ էին հանում միւսնից: Տղայ երեխային միւսնից հանում էին երեք օր յետոյ, որ «ճակտով ըլլի, չամնէ», իսկ աղջկան՝ եօթ օր յետոյ, որպէսզի ամաչկոտ ու պարկեշտ լինի⁵⁰: Մշոյ գաւառում «աղջիկը 4-5, իսկ տղան 3 օր թողնում են մեռնի մէջ, ապա տատմայրը լուանում է մեռնած տեղերը՝ մի մաքուր ամանի մէջ (կարող է դա լինել հացի տաշտ)»⁵¹ եւ այդ ջուրը պահում էին՝ որեւէ անմաքուր իր (օրինակ՝ շան, մկան կպած կամ պղծուած իր) սրբելու⁵²: Որոշ վայրերում էլ լցնում էին թոնրի, օջախի կամ գետի մէջ⁵³, որպէս սուրբ տեղեր: Շատ անգամ Մկրտութեան խորհուրդից յետոյ էին եկեղեցուց բերում շշով կամ որեւէ ամանով լի մեռնաջուր, լուանում ծննդկանի ձեռքերը, որպէսզի անմաքուր չլինեն՝ թէ՛ միւսնահանած երեխային գրկելու եւ թէ՛ տան պարագաներին, իրերին դիպչելու համար⁵⁴:

Ծիսական հետաքրքիր սովորութեան արարողութիւն էր պահպանուել Զաւախքում: Երեխային միւսնից հանում էր դայակը: Նա լողացնում էր գոլ ջրով, քաշում էր երեխայի ձեռքերը՝ ասելով. «Թեւերտ օրն ըստըղըր էրկննայ», ապա քաշում էր ոտքերը՝ ասելով. «օտուիքտ օրն ըստըղըր էրկննայ», յետոյ՝ վիզը. «պոյըտ ըստըղըր էրկննայ»: Տաշտի ծայրերի երկու կողմերում փոքր երեխաներ էին կանգնեցնում՝

ձեռքերին մեկական մոմ: Երբ դայակը երեխային տաշտից հանում էր, կանգնածներից մեկը դէպի դուրս էր վազում. «դուս փախչին կ'օր տղան սրտոտ ըլլիէ, իսկ միւսը՝ դէպի օջախը եւ հանգցնում մոմերը. «դիպայ օճախն ա օր վազեն կը, տղան բաղդաւոր կ'ըլլար»⁵⁵:

Գանձակի գաւառում միւսնից հանում էին հետեւեալ կերպ. հացի տաշտը դնում էին թոնրի վրայ, մի քիչ իւղ կամ մի ձուի դեղնուց էին քսում երեխայի այն մասերի վրայ, ուր միւսնին էր քսուած, եւ կնունքի ժամանակ գործածուած երկու մոմերը, որոնք քաւորի ձեռքին էին, վառում էին տաշտի երկու կողմերում: Ապա լողացնում էին երեխային՝ օրհնելով ու բարեմաղթելով.

«Հօրաւ ըլես, մօրաւ ըլես, Կաւմիւր օրաւ ըլես. Ումիդ էրկան ըլի, Քու հօրն ու մօրը հնազանդ ըլես»⁵⁶:

Կամ՝

«հօրով ըլի, մօրով ըլի, // Բաղդատը ըլի, աստղով ըլի:
Փայով ըլի, ծըլով ըլի. // Աստուած պահի պահպանի»⁵⁷:

Մինչեւ միւսնից հանելը չի թոյլատրուել լողացնել երեխային, որպէսզի «երեխան անմեռն՝ անպատկառ չլինի, մանաւանդ եթէ աղջիկ է»⁵⁸:

Ակնեցիները միւսնից հանելուց յետոյ տղայ երեխային գլորում էին յատակին՝ նախապէս գետնին դնելով մի կտոր հաց, գիրք եւ գրիչ: Այս արարողութեան ի-

49 Որոշ շրջաններում միտոնից հանում էին հէնց յաջորդ օրը՝ առանց որեւէ ծիսակատարութեան: Տե՛ս Լալայեան Ե., Նախիջևանի գաւառ, Ա. մաս՝ Գողթն, - ԱՀ, գիրք XII, Թ., 1905, էջ 140:

50 Նոյնի՝ Զաւախք, - ԱՀ, էջ 271:

51 Նոյնի՝ Մուշ-Տարօն, - ԱՀ, գիրք XXVI, Թ., 1917, էջ 181:

52 Լալայեան Ե., Վարանդա, - ԱՀ, գիրք Բ., Թ., 1897, էջ 148: Տե՛ս նաև նոյնի՝ Նոր Բայազետի

գաւառ կամ Գեղարքունիք, - ԱՀ, գիրք XVI, Թ., 1907, էջ 37:

53 Նոյնի՝ Սիսիան, էջ 231:

54 Նոյնի՝ Վարանդա, էջ 148:

55 Նոյնի՝ Զաւախք, էջ 271:

56 Նոյնի՝ Գանձակի գաւառ, - ԱՀ, գիրք Զ., Թ., 1900, էջ 279:

57 Նոյն տեղում:

58 Նոյնի՝ Բորչալուի գաւառ, էջ 256:

մաստը խտանում էր օրհնութեան հետեւեալ բանաձեւի մէջ. «խորունկ կարգացող ըլլաս, գրչէդ կրակ ցաթէ, Աստուծոյ երկիւղն ունենաս՝ եւ հացդ դիւրութեամբ վաստակիս»⁵⁹: Իսկ եթէ երեխան աղջիկ էր, ապա գետնին դնում էին հաց, բամբակ, ոսկի ու մարգարիտ՝ ասելով. «ոսկիներու եւ մարգարիտներու մէջ լողաս, բամբակի պէս սպիտակ ու մաքուր մնաս, հացդ մատակարարել գիտնաս»⁶⁰:

Նորածին այն երեխային, որին դեռ չէին հասցրել մկրտել, մահանալու դէպքում թաղում էին ոչ թէ համայնքի կամ տոհմական գերեզմանոցում, այլ դրանից եօթ քայլ հեռու: Այդ ննջեցեալների համար նոյնիսկ թաղման արարողութիւն կամ որեւէ աղօթք չէր արւում, այլ անձայն, առանց քահանայի ու ծիսակատարութեան, երբեմն էլ գաղտնի էին թաղում: Մկրտութեան ծեսով, փաստօրէն, հասարակութիւնը որդեգրում էր նորածին անհատին: Սակայն լինում էին դէպքեր, երբ երեխան անկնունք էր մահանում, բայց հարազատները քահանային որոշակի գումար էին տալիս, եւ վերջինս կատարում էր անխօս ծիսակատարութիւն՝ միայն գործողութեամբ. «քահանան եկեղեցու ներսի պատի վրայ՝ որեւէ տեղ, մի փոքրիկ խաչ է կերտում եւ, համաձայն Մաշտոցի կանոնի, օծում (նաչի օծում), եւ կամ մի պղնձէ փոքրիկ խաչ է օծում եւ Աւետարանի կամ սրբերի պատկերների վրայ

կապում եւ կամ դնում աւագանի պատուհանի մէջ: Այսպիսով, ուզում են յայտնել, որ նորածինը նուիրուած է եկեղեցուն, որեւէ սրբի»⁶¹:

Մկրտութիւնից յետոյ լինում էր հրաւերքի ճաշ, որ կոչւում էր «կնքածաշ»⁶²: Կնունքի համար նախատեսուած յատուկ կերակրատեսակներ չեն եղել, սակայն անհրաժեշտ էր, որ երեք տեսակից պակաս չլինէին, եւ դնում էին աւանդական ձուածեղը, «որ ուտելուց յետոյ, հրաւիրեալներից իւրաքանչիւրին համար անհրաժեշտ պարտականութիւն է համարում փող ձգելու ձուածեղի սկոտեղի մօտ յատկապէս այդ նպատակի համար դրուած պնակի մէջ, որից հին ժամանակները հատուցուել է դայեկի կամ մանկաբարձի աշխատութեան վարձը»⁶³:

Մկրտողին եւ նրա հարազատներին շնորհաւորում էին հետեւեալ խօսքերով. «աչուըներդ լուս, շնորհաւոր մկրտութիւն ըլլի, Աստուած հօրով-մօրով պահէ, խոր ծերութեան հասցնէ, քուկ ա, քաւոր աղա, դատումքդ կատար»⁶⁴, «աստուած երեխին օջախին բաշխէ»⁶⁵, «շնորհաւոր Մկրտութիւն, Աստուած տուել է, ամուր ձեռք պահէ, հօրով-մօրով ու բախտաւոր զաւակ լինի, այն հացիցն ուտէ, որ ոչ հատնէ, ոչ պակասէ»⁶⁶:

59 Ակն եւ ակնցիք, նախաձեռնեց եւ հաւաքեց Ա. Քէչեան, աշխատասիրեց եւ խմբագրեց Մ. Պարսամեան, Փարիզ, 1952, էջ 254:

60 Նոյն տեղում:

61 Լալայեան Ե., Մուշ-Տարօն, – ԱՀ, գիրք XXVI, Թ., 1916, էջ 181:

62 Նոյն տեղում:

63 Ծափագիգ Ե., Ծէսեր և սովորութիւններ, – ԱՀ, գիրք 7-8, Թ., 1901, էջ 99:

64 Լալայեան Ե., Ջաւախք, էջ 271:

65 Նոյնի՝ Բորչալուի գաւառ, – ԱՀ, գիրք IX, Թ., 1902, էջ 255:

66 Նոյնի՝ Վարանդա, էջ 149: